

55638
0422
V.20


丘墓文

記言別集

卷之八

BERKELEY
LIBRARY
UNIVERSITY OF
CALIFORNIA

ササ



記言別集卷之二十三

丘墓文

嚴左尹墓銘

公諱鼎者姓嚴氏其先本寧越人高麗尚書僕
射花實爲始祖入本朝有同知摠制有溫摠制
五世有繕工副正曙副正生市署直長仁達直
長生同知中樞愷中樞娶弘文應教李洁女生
公公才藝夙成姿品異等字重叔 仁祖八年
丙科及第補承文權知以右史常侍 上前公
禮貌甚善 上甚重愛之丙子爲侍講司書從

上於南漢明年車駕還京拜司憲持平江都
敗廟杜陌沒公以法罪狀受命大臣戊寅以
繡衣廉問湖西明年以修撰出爲關西都事兵
革之後西省多事蓋朝廷選擇遣之二年復以
修撰召還爲義城縣令乙酉復入爲修撰
時有姜氏賜死事公上全恩劄丁亥爲吏曹佐
郎知製教後年陞正郎金自黜方用事其子
鉞席父勢驕橫無所忌有郎僚附鉞者推薦鉞
欲引入吏曹爲郎公執不可判書趙綱叅判韓
興一皆沮之己丑爲執義吏曹判書沈詒爲時

議所忌而又有時輩之所屬望者必欲擊去乃
代指言某以私得某官某以親得某官公嘗在
吏曹備知某以某事官非私某有某事官非親
因引避大臣已有上疏發此論者以爲護儻公
罷執義宋浚吉代之時自黜以罪竄論罪人諸
客以公亦私相善於罪人亦在竄中左相韓興
一以吏曹時沮鉞事白上特有減等之命付
處沔川尋叙爲太僕正儀改副校理辛卯爲同
副承旨轉至左承旨其年加嘉善仍行左承旨
事上寵待之殊甚壬辰自黜既伏誅兩司復

論已丑得罪者公以薦引罪人爲名在列多知
此事者不從爭之不已領相鄭太和左相金墉
亦爲上力言之公以故得免癸巳中樞公卒
既三年出爲公州以疾歸丁酉奉使如燕既復
命爲右尹尋加嘉義改左尹俄拜東都尹己亥
上登遐卒爲用事者所蔽不復顯用也後連爲
錦山富平戊申復爲左尹有繼母之喪其卒喪
之年九月十九日公卒年六十六上賜吊賻
如儀某日葬于衿川縣水東先塋之次貞夫
人豐山金氏禮曹判書壽賢之女無子取族子

續爲後續某官生一男五女男慶運女五人皆
幼公秀而藝中樞公好簡雅父子爲知已有兄
早歿繼母弟一人中樞公老而甚愛之嘗病疽
幾危殆公吮疽得痊公既貴悉以財產均諸兄
嫂諸妹而不自取曰吾雖微此不至寒餓也知
遇孝廟不隱其賢當官任職勁切不喜脂韋
尤長於剴煩莅郡皆稱治方世道大壞諛妬棄
之坎軻而終銘曰
世之偷朋黨相仇讒夫之熾良善之棄瀚兮訛
兮心不媿矣

宜春君碑

公諱以興字士豪姓南氏其先本宜寧縣人我
太祖開國元功忠景公在之後也忠景公之孫
忠簡公智三世有禮曹叅判世健於公爲曾祖
祖工曹叅議應龍父羅州牧使瑜以武略顯者
也我 昭敬中國有大亂方居母憂起復有羅
州之命其明年從統制使李穡臣與倭大戰於
露梁前洋戰不出母貞敬夫人柳氏大司憲軒
之曾孫而刑曹判書頊之女也明 神宗萬曆
四年我 昭敬王九年公生先將軍死之時公

二十三學書去之慨然以爲必報而死習騎射
二十七擢武科連守邊邑十年長淵時以治理
上賜表裡以賞之後體相李公恒福推薦之爲
富寧三年以能陞通政尋加嘉善爲湖西道節
度使忤用事者罷後爲嶺南右節度使聲績甚
多及遼左陷敗西路甚急公上疏願守一城以
效死遂拜防禦使兼龜城都護府使龜城有百
年碑二年移安州遼民避亂至州者以千數公
立約條待以恩信有違約者罰之遼民畏之主
客相安有遼民繼至者亦聞邑禁不敢犯莫不

曰賢二年擢陞資憲尋罷我 純孝王元年都
元帥張晚駐兵平壤以公爲中軍軍中事專屬
於公矣其明年副元帥迺舉兵叛曰帥府諸將
惟南以興柳孝傑朴震英而已他無能爲也爲
間書至公與二人者見元帥發書罪狀功臣聲
言清君側之惡元帥問計曰迺所領兵皆精銳
而降倭勁兵數萬既衆寡不敵計將安出僉曰
別將柳舜懋李慎李胤緒雖在賊中必不從賊
欲有爲而未得其當耳震英與胤緒素善得其
蒼頭過者連名爲書喻以逆順時賊已至慈山

矣胤緒已與舜懋慎及諸將李珣約束夜半陰
令所領騎士三千一時潰陣馳出适亦莫追也
胤緒見元帥曰我爲將在賊中不斬賊使賊長
驅無面目報 殿下遂自刎乃死一軍大驚賊
從間道過平壤已及黃州元帥聞賊已過乃遣
公與諸將悉兵追之遇於薪橋賊出兵逆戰賊
不可當公使人號謂曰若屬皆 上之所遣諸
將背義從賊敢與 王師抗天道可畏誅及九
族禍不旋踵許銓宋岌寧衆詣軍前乞死復追
至馬灘賊已破李重老軍斬八將頭送軍前以

沮衆軍皆驚恐失色公笑謂曰八將者皆吾所
熟見之皆非其面欲假人頭而給我也軍中乃
定公令軍中曰賊過臨津則京城易撓必及其
未渡當決死一戰至則賊已渡而車駕亦已
南狩矣元帥令諸將曰京城已破莫與交鋒意
從西湖渡兵追及車駕公不從令曰軍法兵
有進無退乃與鄭忠信夾攻之鞍峴朝日賊
覺官軍已先據險以衆兵塞入緣崖蟻附仰攻
官軍少弱莫敢出氣副元帥李守一以千餘兵
來會公立於矢石擊鼓督戰大呼曰明璉中允

墜馬兵氣稍振搏戰自卯至巳賊勢已挫將士
戰益力守一擊破頭局頭局者降倭勁兵明璉
中丸而退大軍遂潰走入城中忠信欲垂勝追
擊公曰不可既以寡克衆天也不出數日兩賊
之頭可致麾下窮寇勿追亦兵戒也适明璉與
敗卒亡去至廣州為其下所殺降 上還都都
元帥晚以白衣伏道傍頓首請罪及定功行封
公陞崇祿封宜春君功臣等各 賜厯馬金帛
臧獲有差公乞歸見老母特拜延安都護府使
兼防禦使未幾召還時有憂急以公習於邊

事而又遺愛在民拜闕西節度使兼兩西巡邊
使寧邊都護府使以龜城爲行營自廷作亂後
功臣等疑忌益甚累起大獄人人自危自公出
塞亦自以得死所云上之五年虜大舉伐我
西鄙二日先驅已薄安州公聞事急領麾下騎
士馳至則奴已渡澹水傍邑兵未集城中兵民
不滿數千與防禦使金浚誓死死守而已書啓
本亦以死自言使其子斗柄馳驛遣之終日力
聞至明日奴攻城益急既力竭矣公登譙樓射
矢且盡奴爭呼速降公叱曰我受命守邊一

戰決死職也乃畏臊羈狗苟活耶遂自燒殺有
二士卒從不去公曰火焰宜急避對曰公爲國
死節爲士卒安敢負公之義也皆不出城陷正
月二十一日而公年五十二母柳夫人幾八十
前年自寧邊歸至家纔半年奴克我關西公知
事不濟已決死審矣柳夫人聞公城陷自殺死
之哭之曰家世將族父既戰而死子又戰而死
其死皆不慚於古人又何恨特未亡人積殃在
身上爲之賜吊賻特厚追爵左議政宜春府
院君表忠臣閭恤其家錄其子孫謚曰忠壯遺

衣之塚在廣州治陰柳夫人以天年終上特
厚賻優禮甚盛公豪邁有氣槩不事細節好施
自親戚鄰里以至疎遠貧者多倚賴焉聞其死
相吊如悲骨肉平生愛人禮士推賢讓能不媚
權貴公之陞官罷官得人之死心皆以此也公
安州時戎倭在邊者公特撫循甚善及倭從逆
叛自中相戒曰慎莫犯南爺無以報德鞍峴之
戰將士獻俘公皆不殺曰彼皆吾民脅從何可
盡殺諸虜皆感激涕泣欲死今鹽州百姓為之
圖畫以祭之水旱疾疫皆有禱謂之北神祠云

貞敬夫人鄭氏我世祖相鄭麟趾六世孫也
有五男長斗極爲司宰監僉正次斗柄爲水軍
統制使官最貴次斗機僉知中樞次斗樞又次
斗杓皆縣監壻三人晉陽君柳孝傑造叛時指
名畏憚爲間者也卒以平造功受封又監役金
振聲郡守李會源子孫衆多三世四世至數百
餘此天道之報也公死之後十年有南漢之敗
鄭公蘊丙子疏曰功臣等擅國用事猜忌才能
幾察日密籌臣不敢論兵將臣不敢治兵南以
興臨死歎之曰不得鍊一卒習一戰卒至於敗

此悲痛之辭 上以此屬反正以此屬臣國云
見危受命能守節死義立百代之名忠臣之烈
也

贈吏曹叅判權公墓碣銘

公諱益中字景時姓權氏永嘉人大父 贈領

議政東興府院君常以至行 宣祖世特加爵

命旌表其閭皇考 贈右議政愷事 宣祖以

節儉重於時妣全州李氏郡守榮緒之女也隆

慶五年二月某日公生有仁孝性及事東興公

能服膺教訓事父母猶恐不以父母心為心莫

不曰能子之職故其生事之權送死之哀祭祀
之嚴至老不急公三十五 宣祖三十八年乙
巳初仕爲繕工監役丙午爲漢城府參軍丁未
爲司憲府監察戊申爲慶山縣監光海八年丙
辰以尚衣院判官爲載寧郡守壬午爲中樞府
經歷時公年七十二以老遂謝病己丑公七十
九趙夫人八十其年設重牢宴一門稱慶明年
庚寅公以壽考陞通政壬辰拜僉知中樞甲午
上優禮高年八十以上者有特資之 命公八
十四進嘉善丁酉拜同知中樞公以大年康寧

簡靜子孫諸婿尚主者一人公卿數人外而州牧都護令長十餘人門戶既盛而公平生好儉約子弟侍側必以侈服滿容爲戒孝宗十年己亥九月四日公卒壽八十九夫人趙氏籍漢陽縣監瑞之女也婦德克順治家以仁事舅姑稱孝婦之行夫人長於公一年公歿不及葬而夫人歿壽九十東與公八十二卒右議政七十九卒公又八十九可謂壽德之世也其十二月某甲子合葬於長湍三井先兆之次有二男六女男大有大恒大有縣令先歿大恒尚翁主爲

東昌尉婿六人府使尹宗之縣監金鼎璜郡守
崔汝叫縣令李弘猷進士李維楫儒生趙公元
大有六男德衍德徽德廣德養德明德潤德衍
參奉德徽判官德廣德潤生負大恒無子以德
徽為後宗之生瑞監役婿四人參判張善澈領
議政沈之源監役尹澈奉事李齊泰鼎璜生華
鎮華鎰華鎔華鉦婿一人儒生金敏賢汝叫生
世徽婿四人奉事李重龜承旨鄭載嵩鄭日祥
朴世萬皆士人弘猷生聖佐文佐興佐維楫婿
三人牧使李慣進士徐宗亮儒生柳檜男四人

幼公元無子內外子孫三世四世至百餘人銘

曰

仁莫善於孝友福莫厚於壽考中樞三世老且德
有自有類有積

河謙齋墓銘

丙午

先生諱弘度字重遠姓河氏晉州人前古有諱
自宗當麗之末世辭軍部尚書僞疾還鄉號木
翁終身不出生大司諫潔潔孫自清爲觀察使
於先生爲六世祖也大父無際父光國皆有才
不見母李氏籍江陽慶士光友之女也萬曆二

十一年八月廿七日先生生有異姿當兵革
之世其父母以兒奔竄道路轉客湖右以兒故
人爭客之十年始讀小學能自知力行十二三
已有求道之志十六先府君歿哭之幾滅性既
除喪徙鄉先生河氏受論語通大義後鄉先生
死爲之服師之服既弱冠遊學宮諸生皆敬重
之當光海時棄舉子業專以經學自勉及先夫
人歿先生已衰喪三年曰羸毀病不復以人事
爲禮惟應接生徒講學不倦好謙約自號謙齊
與人敦厚有禮推其孝弟鄉黨化之 仁祖世

以遺逸累召不起樂居巖泉山齋南因川石爲
臺命曰詠歸臺州牧成以性訪牧民之術仍嘆
民散俗弊先生曰秦苛而民暴漢寬而民厚曷
嘗易民而化之也 孝宗九年召除義興縣監
終不起明年 孝宗登遐先生自以畿內之民
服齊衰三月然後從國制與士庶同服 上之
三年御史南九萬至州訪先生於安溪時朝廷
有爭禮事言者皆斥逐請聞其正先生曰爲次
長三年見於經傳況 孝廟既已君臨臣庶長
少嫡庶何可論也九萬既復 命以先生白

上先生已七十 上賜之粟又有旨尊賜之甚
厚先生上疏謝之仍陳君道九事後四年四月
廿六日先生歿年七十四先生之學本於彞倫
日用之則其操守之常踐履之方一以古人爲
法至如起居服食皆有常度嘗自言吾力行不
如古人知不善則不爲也每以禮勉人爲學必
先行而後言見世亂潔身獨行五十年非其義
也一芥不以與人一芥不以取諸人平生樂與
人爲善篤於禮俗重冠昏喪祭女子之笄國俗
所不舉而獨先生之家有此禮病末俗文弊爭

以著述爲名嘆曰古之人盡言之學者患不行
不患不知也嘗推占日月星辰之度作弦望晦
朔月閏之圖曰今曆法亂矣以此推之庶幾不
失之娶永嘉權氏軍資監直長克義之女生一
男二女男早歿有所後子泳司諫潛之孫也二
婿忠義衛李得夏士人朴英甫其年十一月十
四日癸先生于文巖寒泉上其諸弟子乞銘於
孔巖許穆曰今吾子知先生最深又能言之君
子死餘教不墜令不沒於後世吾子事也敢以
請嗟乎今吾後死而又失老德吾非斯人之爲

銘而誰為敢不諾銘曰
直而溫君子之文確而貞君子之亨順而成君
子之寧

河台溪墓碣銘

公諱潛字晉伯別號台溪姓河氏晉州人高麗
名臣元正公楫之後而大司諫潔之六世孫也
曾祖起崑祖瀚父公孝三世皆不顯母坡平尹
氏軍資奉事起之女皇明萬曆二十五年七月
十五日公生十年出就外傳性沈靜聰明特異
同學皆莫及也十六學既通天啓甲子我仁

祖二年進士崇禎戊辰茂
仁祖六年及第

第三人初授司宰監直長以親老不就丙子之
亂州父老募鄉兵赴難推公為將以父病決不
可起父戒之曰君有難人臣赴急義不可後也
行矣勉之公遂發兵至尚州忽心驚不食以在
軍不得私歸先遣次將戒曰毋後期我以親憂
在心遲數日追及期會二日計至父歿已二日
公居喪毀惑人皆曰善行既除喪由騎省郎累
遷正言獻納持平公既羸瘁病又以母老謝命
即歸未嘗久於官也嘗在諫院上疏言時事凡

萬餘言疏入不下乙酉丁母憂公年已五十哭泣寢地幾滅性服闋連爲執法以疾不就因辭職言李敬輿洪茂績沈膺李應著事仍及諸王孫幼穉無罪事時三臣者爭建儲事忤上意李應著論治獄皆竄北邊姜氏既賜死死而諸王孫流濟州矣疏入即通職已丑仁祖登遐公方疾甚其七月昇疾上道又以持平有召命既入謝又上疏言金自點專權無忌狀即還鄉疾益甚累轉掌令司諫執義皆不就戊戌二月廿八日公歿年六十二計聞上以禮賻之

而允知公者莫不惜其不大用而多出涕相吊者公性至孝寬厚愛人為兒時有同學兒因一念爭奪其屨割而投之公無愠色人問之則曰無此事亦不與人言聞者賢之及長有外祖母鄭氏年老無子公事之如事母歿而葬當合葬於外祖而有鄉丈老居其下以爲家與葬同忌欲爭之公不與爭終以誠意感其心其丈老聽而合葬焉既顯嘗在臺省或竊其鞍從者舉其可疑者請治之公笑曰吾所失小而彼蒙惡名大矣勿問也其竊者還其鞍其忠愛感人如此

此皆君子之小節而爲教於後人多矣嗟乎才
德之生不偶然而官不稱利澤不博何也天之
將畜德厚積以裕其後人耶俶人鄭氏籍瑞寧
副護軍霖龍之女也生七子男三人海宇海容
海寬女四人其婿許塤金好謙姜齊泰林東遇
銘曰

寬而嚴君子之廉忠而慈君子之確

李相國墓誌銘

公諱聖求字子異系出宗室太宗諸王子敬
寧君祔之後也曾祖贈河東君裕祖兵曹判

書 贈領議政諱希儉父吏曹判書 贈領議

政文簡公諱晬光母安東金氏義禁府都事諱
大涉之女而上洛公諱方慶之後也萬曆十二
年甲申公生十二始就外傳二十補成均上舍
後六年戊申以甲科分承文院俄選翰苑兼侍
講院說書有同僚欲薦引戚里者其氣勢盛公
斥之坐罷三年叙爲典籍監察禮兵刑三曹佐
郎再入騎省爲正郎連在三司於是有永昌獄
起鄭造尹訥首發 太妃各處之議時公爲持
平始貳於時議白以李相國嘗薦引被罪者論

罷公曰罪狀未著薦人何罪用事者以爲某族
連罪人公亦罷既叙又斥出伊川一年以母憂
去戊午以永平縣更置永平府公爲新官蓋選
擇任之庚申李相國死謫所歸葬抱川鄉人爲
之立祠時抱川爲府屬邑以爲相國立祠專咎
公永不許叙既去邑人立追思碑癸亥 仁祖
既及正公起爲司諫首言禁捕罪人支屬寬都
門警守焚沉香山罷妓樂頒教八方人心大悅
累轉政府舍人弘文應教選將才公擢爲江華
府尹一年入政院至左承旨歷禮曹叅議兵曹

叅知大司諫夏 穆陵崩日官以爲既修改吉日大臣疑不決公曰山陵之變出於不擇之日修改之節何論擇日群議乃定丁卯虜連陷兩西公以吏曹叅議從 世子至全州戊辰復爲左承旨受 命試武科于吉州還上北路民瘼政弊十六條進嘉善爲湖南觀察使文簡公患暴風 上令無待代歸至家文簡公卒服闋即拜大司諫俄進都承旨冬特拜吏曹叅判歷刑曹叅判京畿觀察使又以大司憲移副提學再爲都承旨時有追崇之議 上不待群議歸正

欲先奏請於帝三司力爭大臣亦庭請忤旨者多得罪適有災異上下教求言公啓曰言雖切至踐行無實則不但感天難人心亦不快矣仍言爭論變禮上下否隔天人一理夏霜元旱豈無其由上感其言即令得罪者皆宥而奏聞事亦止時吏曹判書缺大臣薦之公遂爲吏曹丙子夏以兵曹判書兼體察副使先是我與虜許通貨開市虜旣稱帝改元朝議以爲當以義絕之公曰我力弱先絕非計也時虜使至京城惡以作亂迫逐出國冬虜大舉東創三日

前驅已薄國都體府募遣精騎五百據扼險阻
崔鳴吉往虜中約成而官軍已爲虜所掩敗

車駕將行江都惡馳入南漢諸將相大臣皆曰
城雖險積粟少人無固志不可守也公曰急令
申景禎截賊路車駕入保江都萬全計也明

日上從東門早出上忽心動乃止公又勸

上分朝世子從京畿疾馳一日可至南陽急

入保江都以成犄角之勢國之長計無善於此

也不然江都亦難保也諸議論不定乃止公曰

事急矣今東路幸無阻上可以間出兩南兵

力足可恃也臣當以死守之 上曰予與父兄
百官皆入於此予獨棄之安往乃令體相璽及
公聽軍誓公對曰敢不竭力繼之以死虜前驅
不滿數百大軍未到急擊之以折其鋒鳴吉請
許入虜以結約誓公曰不可引賊入城示我虛
實非計也彼不以卑騎入城從以百騎千騎其
可制乎鳴吉不從虜果潛師已薄城矣然後乃
辭焉虜知謀泄不入也鳴吉言於 上曰某臨
亂不動國人之所不及也虜欲入城約誓臣欲
聽之某曰此覘我也不可許也果然臣不如也

虜大軍既至山城受圍四十餘日既而兵少食盡城中已急矣於是江都陷敗諸妃嬪王子貴臣家皆已被驅至城下下城之議遂決體相溼嘆之曰某可謂無愧前言者也虜既約誓而歸世子將北行大臣皆老不任行公遂爲右相陞左相以行下城時大小畏紉聽其約束責幣之多不可計數而莫之違也上悔之更遣公欲改定約條至則事大乖背及我所料者而彼知公一子在虜中責金迫遣甚急既還詆公者以爲廢事贖子公罷相未久有南警言上欲復用

公叙爲領敦寧尋改領中樞己卯杜使來言王不可不入朝否者當有大貴上召諸臣問計皆曰不可違也多引前朝古事爲言公曰不可城下之恥忍而至此者爲有後日故也彼責我多無狀至國不爲國而世子返國且無日矣不得兩全宗社爲重不幸卒有變故雖欲悔之無及矣不如早定大計也上爲之泣下稱善左右皆泣不敢復言辛巳公復入相爲領議政時杜使至言黃一皓前爲義州陰厚內附者罪當死公極言辨之使者怒曰苟如此不得三

日作相左相申景楨慮其禍大欲無辨公曰雖
不作一日相見人無罪而見殺可無救乎使者
怒一皓終見殺人心大驚壬午夏史官薦後進
一人公惡非其人上劄論之遂削其名時議大
怒承旨洪茂績憤憤論啓後日登對茂績從之
公召下吏曰彼與我爭辨上前事體不可令
他負入侍茂績不得入又上疏言之公遂謝病
劄十上乃適相冬又有李炷事吐使以炷通款
南朝繫之灣上監司具鳳瑞啓以炷供辭多言
國之陰事炷既誅將族其家公上議曰此言出

於鳳瑞傳而已語緒未著必得其實狀然後
慶之可也群議以爲護逆以無上不道當竄
上察其無他罷黜而止公既積怒於時議客有
欲規之者公笑曰子欲我效一切辯士先合於
世主者乎作事在我成敗事在天先枉在我者
以求合在天者可乎客不復敢言公僑寓西湖
築小屋曰晚休堂日與隣里故舊逍遙自適吟
哦以自寓有西湖鄉約記癸未復叙爲領中樞
仍居江上不起一年卒年六十一計聞上爲
之罷朝三日賜吊賻如儀自歛至葬皆用恩

典甚厚墳墓在楊州治西三十里長興族葬也
李氏三世之墓皆在公通籍將四十年前時小
人亂政坎壙十年當此時持論甚嚴及至貴用
好寬大敦厚鎮物或疑其前後不同公曰小人
擅國君子當盡節君子在位不肖者當退更何
所爭性不矜不伐以持重得體爲心久居本兵
所用武人自閫帥諸將以至小官列士無一人
以私善得官者如福得親近多宿將才武退則
私相謂曰吾輩處門下久矣亦未嘗厲聲加斥
而每進前不覺汗沾背也自遭遇聖哲貴至

千乘相人臣之位極矣一以盛滿爲戒貴而能
貧及卒衣食不備諸大夫歸祿以成歛吊者皆
歎息賢之 上常倚任爲重以忠亮許之而李
相國時白曰自中興來上之所擢用爲三公者
論人物以公爲首云貞敬夫人權氏籍安東舍
人斯之女生五男尚揆同揆堂揆碩揆台揆同
揆承政院承旨堂揆方爲咸鏡道觀察使碩揆
戶曹佐郎台揆楊口縣監女二人婿判書李一
相韓五相五相登第未出仕而死江都之亂權
夫人與長子尚揆及其妻子婦具氏皆死節旌

表其間內外子孫三世四十餘衣冠而顯者五人同揆子正字玄紀其婿前副提學李沃堂揆子修撰玄錫碩揆婿叅議李聃命李一相婿承旨金萬均前夫人節度使尹說之女而早世無子孫其銘曰

窮不易操磨而不磷達不改節貴而能貧進不隱賢退無怨尤嗚呼純臣之純

贈注書韓君墓碣銘

君姓韓氏諱五相字世翊宣祖平難元功清川君準之曾孫鎮岑縣監汝洞之孫同福縣監

榘之子毋李氏

贈領議政綏祿之女也清川

君長男僉知中樞汝淑之嗣以從子榘爲後故
君以中樞公爲祖君生而姿品異等自爲兒時
不喜戲狎端重如成人力讀書比長名譽著聞
仁祖末年擢司馬壯元後五年除獻陵叅奉
其年選大科未殿試有父憂既禫又母歿三年
夏家大疫有妹死而其穉子病危殆君躬救視
不去卒傳染乃死君自三十二連有喪被褻哭
泣五年卒遽癘疫死莫不曰良善亡矣良善亡
矣年三十七列其善行大者事父母愉而敬事

尊長恭而謹與朋友信而規篤於親仁博於文學好恬靜方正溫雅平生非聖人之書不讀專致力於經術葬砥平縣之白洞君死之後有承旨南九萬上疏言之追爵承政院注書兼春秋館記事官君初娶故相李聖求女丁丑江都敗守節死之無子後娶府使鄭基崇女生均君死鄭氏自刎殊而未絕及均又死終不食而死一女嫁爲生負申厚軾妻又歿折無子李氏墓在楊州李相國族葬鄭氏合葬於白洞君功臣之世嗣絕盟府啓 上以君之從弟之子埏爲後

銘曰

至厚者行藝至著者名譽至感者短折至薄者
嗣絕吁嗟世翊

右贊成竹泉李公墓誌銘

公諱德河字遠伯姓李氏本韓山人族大而舊
當麗末有門下侍中穉侍中五世至左議政惟
清左議政長男湖南觀察使彥浩於公為曾祖
公實左議政少子翊衛彥湜之曾孫而皇考護
軍澳為後於堂叔父別提濡濡觀察使之嫡子
故也妣驪陽閔氏肅川都護府使元宗之女嘉

靖四十五年八月乙酉公生少負奇氣倜儻不羈及知讀書折節力學好凝重無疾言遽色寧原君洪公可臣遇於逆旅歎曰他日公輔之望在此人二十五選國子進士後六年冬庭試登乙科及第薦翰林三年拜正言宰相李德馨薦之後在玉堂當洪汝諄任國老用事柳丞相成龍既黜去朝士大夫有惜丞相之黜者目之曰姦黨欲並逐之陰令其客上書攻擊且盡公極言用事者相朋黨排擯異己陰譎不正尋逐出爲礪山郡守一年以病去三年復召入光海

元年由應劭陞同副承旨辭不拜三年既從祀
五賢於太學右贊成仁弘自以南冥弟子詆毀
晦齋退陶之學太學諸生空館力爭而四方之
士主書言者日多光海既傾信仁弘皆不聽公
爲副提學寧諸學士進諫曰上初心不繼尊賢
重道之意中道改路以太學四方之士皆肆睚
誣而一人之言能盡忠於上也殿下之好惡不
亦慎乎秋移左副承旨後或由祭酒或由諫院
或由儀曹六爲密直雖當昏亂之際能諳練治
體修舉中書古事於是遼廣衙門日誅責於我

多無狀朝廷將移行省請責之公曰投鼠而忌
器以藩國罪狀王人於義不可遂寢其事有倭
臣使人上書言功德勸上尊號公斥去不奏每
因災異言土木冤獄事光海雖不悛猶知爲國
無他意連上疏乞免光海不許特加嘉善大夫
仍行都承旨見朝政日亂力求補外自乙卯五
六年間有湖南海西之命而時西鄙多事嘗築
城於黃州還陞嘉義辛酉復入中書頃年遼左
之役王師敗沒而我軍帥先已陰使人約降明
年帝遣監軍使者詔徵發令躡虜之後而實

幾我也。於是公賢於辭，令超遷至正憲大夫。
癸亥，光海廢時，先有上變事。公直禁中，及兵入，
掖庭擾亂，百僚踴匿。公公服坐堂上，不動。有將
士迫執，行一武人微服負行曰：「此公一心徇國，
無私。吾感其心，終不言其名。」時上以兵衛在
西階之上，令肅拜。公立不拜，曰：「吾不知此事，何
以拜爲？」上後有數人目之，拔劍前擊之。舉義將
金瑬、李貴叱止之。瑬因私謂曰：「毋后幽閉國，
大亂此及正也。」上定遠君之嫡嗣，公宜拜之。
公曰：「諾。」即拜。上爲之起，公跪曰：「願勿殺舊君。」

因泣下 上曰何爲出此言也及以事白 太
妃 太妃持之令上傳國璽符公請對簾外進
言曰 聖母幽閉十年 主上出萬死之計賴
天之靈 宗社再安今名位未定群情疑恐乞
亟從臣民之望然後 太妃乃許而 太妃既
積怨於光海曰讐必斫乃已公對曰不幸姦臣
敗國廢君安得無罪然既已君臨臣庶義不可
奉 旨 上既即位首啓 上曰 上以大義
舉大事願以勿殺爲心因自言前時職在侍從
之長不能匡救爲臣不忠以罪乞辭 上愈益

賢之尋出爲湖西觀察使力辭不已 上厚賜
賚每以忠義許之明年李适作亂 上出幸公
山及适敗死 上還京賞群臣公以判尹進階
崇政大夫及十五年春 上還自南漢公以左
叅贊加崇祿尋行禮曹判書啓以變亂既多教
化壞敗令諸生講小學四書取士如陞補法
上從之其年清人克關內誇矜有勅書朝廷表
謝大臣欲稱賀得其喜心公正色曰我之於大
明義不可忘今關內陷敗皇孫見俘勅到謝則
猶可賀則不可 上深然之癸未復入都堂兼

判義禁明年四月沈器遠謀叛伏誅 上內鞫

罪人私屬鈞問平日往來親密罪人者辭引觀

察使朴演司諫沈東龜 上下其事公曰有司

職當鞫治內鞫不可當封還 上旨大臣惶恐

不肯從公因登對力言其不可以故辭引者得

免死而明慎刑罰獄事無枉於是罪人收孥連

坐年不滿十五以上者除待年之律公實有力

焉五月加輔國崇祿時右相缺 上欲相之有

大臣以老沮之不果相明年拜右贊成 上嘗

不豫以元孫微弱欲擇於諸王子有一二臣忤

意上頗不快群臣皆曰如教公徐言曰自古
變易太子臣下有以死爭之者今王言一出皆
曰如教陛下將焉用彼臣哉元孫者宗統所
係名位已定人心屬望久矣一朝易置不可願
上平心深思往古成敗之事六月公病上遣
醫問之後月廿九日卒壽八十訃聞上爲之
罷朝巷市以厚禮報之追贈領議政九月葬
于高陽世葬前夫人申氏之墓在右夫人故禮
曹叅判湛之女有古賢夫人之德事舅姑能色
養三十七年卒既四十有二先葬故在右夫人

生三男一女長男昌源掌隸院司議次光源楊
口縣監不幸早世次行源以科目顯嘗在玉堂
出爲黃海都事女一人適今儀賓府都事閔汝
鎮判中樞馨男之子也後夫人延安李氏 贈
左承旨承尹之女生一男翊衛司侍直正源又
有側室子男女五人男由源希源世源婿鄭井
源柳晚昌源生二男二女男先慶長慶先慶進
士婿主簿姜頊進士姜文粹光源生一男一女
先慶婿柳慎吾行源生二男三女男萬慶壽慶
皆生負婿洪箕錫權愈南尚憲正源生一男二

女男雲慶婿進士睦天成女一人未嫁閔汝鎮
生六男三女曰俊曰漳曰繼曰沆曰瀛曰澥婿
正郎鄭樸鄭熙壽俞命說由源希源世源鄭井
源柳皖皆有子女子孫至曾玄之世凡百餘人
公莊重有德量廉公篤厚謙退不爭至於臨大
事正大義堅嚴雖自謂賁育不能奪也嘗自號
竹泉每退朝無事日以經史自娛有所著付窓
閑話傳于家銘曰
惟寬而廉惟直而謙惟堅而嚴惟相公之烈崇
且欽

弘文館修撰李公墓碣銘

公諱行源字百初韓山郡人高麗判門下穡之後也曾祖 贈吏曹判書鵝山君潛祖 贈領議政韓安君漢父右贊成 贈領議政德洞母高靈申氏禮曹叅判湛之女也 仁祖十六年公三十六以公卿子初授 陵寢郎其年上親試士登丙科及第補承文院副正字明年改政院注書又明年遷春坊說書尋復爲注書陞成均典籍轉禮曹佐郎移兵曹陞正郎本曹古事曹郎一人掌軍布出納之數末弊擅出惟所

爲不問公私人亦莫恠也公意惡之避不管其
事曹中竊多之尋改諫院正言移司憲持平壬
午爲畿省都事後再入諫院爲正言選玉堂爲
修撰贊成公卒既三年復爲修撰公素不樂於
世路亦不與人交驩往來不以仕宦爲心 仁
祖特選公既廉問址界己丑 孝宗立又受命
再出址邊条上節鎮諸邊邑不法兵民積弊
上皆用之址邊遐遠文學絕少白 上請頒賜
經史諸書以勸子弟子弟舉於鄉者令官給資
遣詣京試定爲令式庚寅復爲修撰三上疏辭

之與爲靈巖靈巖南海上大邑去京師絕遠百事廢壞其積弊甚者通租虛簿至七千公力申當省悉蠲之尋坐前守事卒就理配西海之楊山靈巖父老至刻石追思不已丁酉叙爲海西省都事已交爲蔚山辭不赴辛丑以成均直講出爲通川甲辰復爲直講陸司藝公素多病亦不樂於朝求出爲青松丁未某月日歿於官年六十五公方廉簡通籍三十年未嘗以利害易其操亦未嘗營立尺寸以爲私善與人忠愛自童子時見人之惡必資其有無道遇溺水死者

廢日躬救視活之贊成公聞之曰兒必受其報
蓋其天性然也家居善於父母昆弟公之仲述
初賢而無命四十五遽積疾乃死公終身痛之
未嘗對人言死事淑人河東鄭氏正言應斗之
女也生二男萬慶壽慶萬慶生負壽慶承文博
士女婿三人洪箕錫權愈南尚熏愈承政院注
書内外子孫甚多其成人者六人萬慶子蒞生
負壽慶子涪涪箕錫婿鄭棫愈子護尚熏子迪
明其銘曰

簡而不誇直而剛事明義正壯方之人多公德

惠彌長

兔山縣監李公墓碣銘

韓山李景沆公直高麗李文靖公穡之十一世
孫也曾太父 贈領議政澳大父韓興君德演
父司憲府持平性源以篤行聞其銘曰忠敬篤
厚直而不激孝悌之積毋崔氏別提琛之女也
公自童稚時善於父母昆弟事親一以承意順
適爲心比長則端重謹飭以篤行誼 顯宗初
選用才行公初授 光陵叅奉欲不出雪翁先
生勸之仕累轉司饗院奉事內資寺直長叅上

爲尚衣院主簿改司憲府監察有當路者怒其
不悅者同列皆被其慢公恥之遂不仕尋拜知
禮縣監問高年愛民禮士薄歛節用蠲逋欠五
百不責於民縣有立巖川石之勝在武屹下無
事則每遊賞以自娛及解歸有兼任者欲出計
外以資送之公曰吾已有十日食謝不受既家
居二年復爲監察其年爲兔山縣監縣多山地
狹居民少而諸軍屯田滿邑後煩賦重民不堪
公申當省罷屯田躬自薄保惠百姓出於至誠
三年公歿於官年六十五吏民涕泣相吊於道

路公平生好讀書非聖賢之書不讀教子弟必
先行誼而後才藝於親戚不以其人之貴賤而
厚薄之與朋友交初持一心無所變節性恬泊
不喜紛華口不言生產貨利聞人之過但曰吾
自不爲何必言人之短所相與善非孝友良善
必文學名譽晚遊雪翁之門心相許妻宋氏其
本德恩縣人大司諫應溉之曾孫掌令錫胤之
女樂觀小學三綱行實以自律善事舅姑及公
連爲縣邑一不以廩祿之外取爲贏饒禁絕奢
侈以爲子孫戒亦婦人之賢者也有三男濟灌

淨又二女婿洪萬源閔光魯濬生繼程希程又
有一女灌生期程志程就程又有三女淨生二
男一女皆幼墓在湖西之汧川郡治北二十里
鰲谷南向之原宋氏合葬銘曰
廉介不苟好善出於性嗚呼祿仕棲棲沉抑而
不發者命耶

首陽鄭君墓銘

首陽鄭希聖有立隱德不售於世者也與我同
學於南宮斯人者敦厚忠愍行誼如古人長於
我六年我兄事之有子五人君爲次子命名曰

東稷好讀書檢身有禮知過則改見善則遷嗜
學不倦其心以爲一事不如古人非古人也必
勇往力行其學以躬行心得爲要吾字之曰文
翁 孝宗元年選國子生負後十年三十六死
嗟乎命也吾哭之曰善惡性耶窮達命耶脩短
定耶自古良善多窮窮者不長天道泐汰難謀
者理耶今君之亾尤致憾於蒼蒼者也以君清
明之氣篤厚之行不急之學所立者正所履者
順亶亶乎古人不幸窮歟而不長此命耶定耶
孺人黃氏湖州牧使尿之女也有婦人媿德孀

居十二年四十四歿合葬之墓在長端西道台
藏洞生光圖光疇光圖亦早歿女婿一人生負
李玄紀首陽之鄭自國初相乙卿大於本朝其
後有檢校漢城尹岡副知通禮門事旗於君爲
八世七世而縣令汝忠宣務郎文亨爲大王父
王父云銘曰

嗚呼有生之本其氣有清濁厚薄之殊善惡窮
達脩短不一歸化者茫然而亦有相感之氣增
使我泣涕沱如

西澗翁墓表陰記

公諱夔字千春姓李氏本慶州人慶州之李皆
祖李謁平昔羅興大封五姓李其一而子孫貴
大高麗世有李世堪者忠烈時登天塲及第爲
密直副使其三世孫誠中逮我 太祖太宗爲
左政丞政丞五世有舍人瑛舍人生貴男桃源
道察訪於公爲皇考母延日鄭氏生貧沃之女
公好古人氣讀書潔行五十年不以困苦而易
其心當光海時隱居養親不求知於世也及
仁祖世副提學李命雄薦其行誼累除 恭英
陵寢齋郎後爲內膳寺奉事尚瑞院直長時大

夫人已九十餘蓋爲親屈也大夫人歿不復求
仕仍多病居仁川自號西澗老翁公生於萬曆
己卯歿於我孝宗元年庚寅年七十二公早
失先人當亂離常痛恨葬而不得盡於禮也終
身不求輕煖遺命薄葬公之墓在坡州分水院
上西向之原妻李氏非一李我太宗別子孝
寧大君補之六世孫也生三男二女長男齊漢
縣監次冲漢次之漢皆士人其二婿具鑒閔周
才亦大家之世也

言別集卷之二十三終

記言別集卷之二十四

丘墓文

守江原道觀察使禹公墓表陰記

穆愚下少時未及師事公後從前輩聞閔先生
穆公曰豪傑之士然後穆益慕公之為人聞公
之一言一行皆識之公之側室子某嘗見余於
趙上謂之曰先人墳墓在分石將埋沒無以表
之願得一言穆以慕公之心忻然欲諾之顧以
淺陋不敢諾也未久其人死其弟某繼其亡兄
之意泣而言余感其言即書其墓表曰公諱伏

龍字見吉姓禹氏本丹陽人其別號懼庵少時
從幸村閔純先生學十四先府君歿其居喪之
節一如成人觀者皆以為知禮及長從柳眉岩
許草堂諸公始知名於世二十六為大夫入始
應舉明年癸酉陞上舍公舉止詳嚴無戲狎諸
生皆重之多擬為模範亦以時三公帥六卿入
太學試諸生諸生序列拜於庭下公獨揖而不
拜禮官召責之公對曰非君臨之禮諸生不當
拜庭下自世祖為國相時始行此禮其後趙
文正公以為非禮罷之及南袞為相既嘗多殺

士類怒諸生謗已遂復其拜小儒未達其宜不敢拜皆稱善定為揖禮出復禮賦擢公為第一
丁丑公應選初仕為文昭殿叅奉用太夫人之命也因廢舉曰既入仕而復求舉非義也已卯
改永崇殿叅奉右議政李公鐸吏曹判書李公珥交薦之後陞內贍寺直長明年陞宗簿寺主簿轉工曹佐郎壬午為木川縣監四年以治理
第一陞金浦縣令其明年觀察使又上治效
賜帛褒之其十月八為司憲府持平時太夫人
歿既葬居廬於是有講禮答問已丑為龍宮縣

監壬辰春倭大舉入寇而慶州河陽境有亂兵作亂官軍赴援者連敗人心大懼公發縣中兵合醴泉兵三千過河陽遇盜力鬪盜敗散追逐得六十人縛而數之曰若罪當斬無赦脅從當宥今慶州朝暮且急立功則更有賞皆伏斬其首亂者三人前驅未至慶州三十里止舍夜盜急擊官軍醴泉兵亂既射殺其領將其前擒者皆奪之公既整軍遲明引至慶州以兵屬節度使當此時慶州已急而上游援兵至者惟公所領兵三千而已於是賊連勝遂前諸城大潰公

還縣募鄉縣子弟得千餘遇賊數十合縣得全
事聞上手札寵獎之賞加通政大夫十月陞
安東大都護府使乙未李文忠公某為領相體
察兵馬巡行南方州縣有河陽人訴之曰某前
任龍宮時領兵到阿火驛濫殺河陽之人體府
按驗其狀盜儻得攀緣士大夫以為援據而更
革面反訴如此李公怒執其反訴者斬之軍門
事在李文忠公事中方賊乘勝天子遣將救
我賊大窘據我南境邊海久為賊所而提督既
復三京自以功多其意已怠復疑畏窮寇尚強

一朝挫折無前功以大兵屯忠州以觀望時經
略責提督以賊已敗北而不追擊出境為咎促
進兵不已公至軍門見提督為言南方地利險
阨人心日望大軍來臨而賊方窮縮狀提督大
悅乃出兵南下而實無闘心於是公當板蕩之
際賑飢勸農給餽餉不絕 上賢其勤勞賜粧
馬以賞之時戶曹判書闕 上令大臣薦其人
左議政金公應南右議政鄭公琢皆曰無愈於
某明日領議政抑公成龍白 上曰某賢能固
當大用安東嶺南要衝保障之地某方得吏民

心今若召還百姓失望上乃寢其薦公為安
東五年上疏自陳仍及時獎其略曰臣所陳者
梗槩而已其小者煩屑而不暇舉其大者忌避
而不敢盡臣罪大矣正朝廷立紀綱愛養民力
修明軍政今日之急務而其本在殿下之一
心豈有大本不立而朝廷自正紀綱自立軍政
自修者也殿下非不恤民而民生日瘁非不
理財而財用日匱非不治軍而軍政日紊其於
恢復之圖無異却步而求前此不過大本不立
其所以行諸事業者文具而已今日降一旨明

日行一事徒紛紜卒無歸宿委靡渙散如日將暮臣每念及此不覺流涕繼之以痛哭上嘉納之即許其代冬拜江原道觀察使上疏力辭時倭再入寇既請救於中國舟師循海路至江華上將擇遣其守難其人諸大臣僉曰某前為安東功績著聞領議政嘗在朝亦稱其賢能以為非此人不可上然之即有江都之命公受命即行府中皆喜得人後王叅政與語大悅曰子以清選出司錢穀不其少用之乎昔蕭何守關中轉輸不乏卒成漢業子得毋與蕭

相國比耶時妃嬪諸公子皆在江都公奉給無
厚而守法甚謹以故掖庭私屬多憚之時適有
軍門將士卒至坡州出不意悉芻馬之供不及
本州當罪而公摠掌凡兵馬供給諸事故竝詔
獄尋罷出其後連擬望天曹政院龍灣尹嶺南
觀察使 上皆不用右議政請 上曰不用某
竊不知其故也 上曰不忘矣己亥為洪州牧
使明年兵馬體察使李公恒福啓聞某政有条
理禮讓化俗云 上命進階嘉善大夫有當路
者惡之力攻之卒改正而繼有廢聞故 賜帛

寵之昇罷辛丑大臣薦之為忠清道觀察使上
疏辭之正言宋淳嘗不悅啓上曰某雖以經
學擢用他日門蔭之希冀濫越者因此以為藉
口上不聽嘗臨朝問曰某久不辭朝何也大
臣對曰某名節之士臺諫論之必不出請改之
即日改羅州牧使上曰大臣言之欲治羅州
以為保障之托公居羅州二年御史連上治績
上加寵賜賚之丙午拜忠州牧使居一年罷戊
申上既昇遐光海君嗣位而李文忠公復入
相建大同法推薦公攝宣惠府事時臨海君獄

事大起而鄭仁弘始用事公語仁弘曰保初節
雖易保晚節實難老入脩門勉保晚節仁弘心
不悅公告人曰德遠非前日之德遠當絕因不
樂仕宦與宋仲懷書曰羈縻宣惠之役徒費廩
粟前頭之憂不在民役之均不均北村烟月閑
送餘年此第一計也遂謝病秋為錦山郡守見
世道日非益無意於世棄官歸後有成川之
命不起而有臺諫李昌後竟劾之壬子鄭仁弘
入為左相嘗過之公曰朋友之道道不合則絕
謝不見公既與世俗相踈絕不復繫心榮辱潔

身獨行以自娛明年癸丑歿於麻田之無茅庄
無茅庄者在壺口峽裡江上別業公天資卓犖
好言論臨事善謀嚴於義利邪正之分君子慕
之而小人多忌之其學篤於人倫察於事物尤
致勤於報本返事之節而推及九族親戚之飢
寒無所歸賴公而得其生養者如特父母治之
郡邑百姓之窮無告者咸得其仁而如閭巷之
善行皆無不表獎而加勉之於是賢愚皆服其
德而方國內大亂公私板蕩當事立辦不失機
宜我宣祖世稱良二千石公為第一事業雖

不大施於一世亦其較著可述者如此而孔子
曰邦有道則仕邦無道則可卷而懷之其進也
有禮其退也有義能立不撓邪世不能亂亦可
見君子之偉然者矣信乎豪傑之士也公六十
七歿公高麗門下侍中天錫之九世孫也曾祖
孝親我 成宗時以遺逸徵為掌隸院司評皇
祖舜佐皇考崇善皆有隱德高行至公乃大發
云母李氏古甲子各人再思堂龜之孫也公娶
宋夫人無子有外孫曰之恒光海宰相某之孫
進士有側室子五人敬彥敬資敬弼敬民敬錫

敬弼嘗舉進士早歿敬錫以科第得仕今為永平縣令

石潭李公墓碣銘

公諱潤兩字茂伯姓李氏別自號石潭其先廣陵人高麗時有判典校寺事集古之聞人子孫連為大官顯者四世至承仕郎摯始居星州於公為高祖曾祖諱德符成均進士祖諱遵慶早世父諱熙復賢而不著後追爵承政院左承旨母道州金氏圖畫署別提崇祖女也公少師事鄭寒岡先生聞為學之方二十三取進士後十

六年選博士科補成均權知光海初為政院注
書兼記事官改藝文檢閱兼侍講說書時鄭仁
弘方用事公在史局直書其所為為韓續男所
劾去後陞待教奉教皆不就連貶官以典籍出
為輸城道察訪鏡城府判官輸城鏡城皆絕塞
累千里鏡城古石幕之墟其俗雜胡羯尤難治
公為政以誠善推恕既還其人治鑄鐵碑追思
不已既時事大變不復以仕進為心講禮於泗
上庚申鄭先生歿行心喪之禮癸亥 仁祖既
反正召拜禮曹正郎旋改司諫院正言尋薦王

堂以修撰陞校理甲子李适叛上南狩以公嘗
出北路得吏民心特拜招諭御史冬為應教論
政弊仍白上曰君臣之禮太嚴抑損天威以親
臣下上從之丙寅有啓運之喪一用后妃禮公
方為司諫歷舉違禮大者六事力爭上怒遽司
諫改成均司成尋遷政府舍人知製教明年行
世子嘉禮公以輔德加通政出為潭陽為政必
先學教禁奸猾邑大治去後有政清碑又有興
學碑卒未為工曹叅議後年患風痺辭疾歸田
里三年而歿自朝之大夫士以至草野韋布莫

不曰君子人亡矣相吊如親戚公嘗以靖社原
從既歿追爵吏曹叅判公生於隆慶三年十一
月四日歿於崇禎七年八月二十九日年六十
六其十二月十五日葬陶唐之洞南向之原公
遊於大賢之門其居家事父母處昆弟固君子
善行而能直而和嚴而有容事君以直道聞治
郡必以教民善俗為先居陋室恬靜與物無競
好讀書常謂子弟曰天道福謙人道忌盈吾起
自寒門官至大夫之列亦足矣幸無大過得正
而斃吾日勉焉者也平生行己必正辭受必謹

守道不苟一以興學右文為心夫人仁川蔡氏
國子生負應麟之女生三男二女子孫繁衍其
顯者次男道長為弘文應教道長長男元禎司
農亞卿次男元祿長淵都護府使元禎長男聯
命初仕為成均學諭子孫俱列于左其銘曰
確而廉和而不疵可以教可以儀君子哉魯無
君子斯焉取斯

黃山道察訪鄭公墓碣陰記

府君諱擢字

姓鄭氏其先慶州人我 太

祖功臣左贊成鷄林君熙啓之六世孫也皇考

漢城府庶尹諱明善敦寧府都正諱世賢之次子而為伯父朔寧郡守諱世豪之後二公皆受業於朱溪君以才學聞妣咸悅南宮氏觀察使淑之女嘉靖二十年辛丑八月廿六日府君生己卯選司馬試己丑以公薦除黃山道察訪壬辰兵革大起府君避亂於朔寧其八月二日府君歿嘉靖中先王父為郡時府君生四年王父公歿於官其後五十二年府君又客死於此嗟乎死生皆有命天也葬于麻田郡治西十里獨將洞鄭氏族葬府君嚴正有法度善楷書皇考

度尹公以書名世蓋其筆法有自而今其子孫亦多以書稱者宜人昌原黃氏右贊成士佑之孫而成均生負瑞奎之女也與府君同年十一月四日生府君既歿又其年同月廿三日宜人歿而合葬焉有一男四女男皓郡守督四人郡守洪瑞龍進士任大禪縣令朴儼叅議宋克訥孫二人弘基昌基昌基進士內外曾玄孫人而於宋氏無子

清道郡守鄭君墓碣陰記

公諱皓字

姓鄭氏本慶州人其先始大於

高麗至麗之世有侍中暉最顯主左贊成熙
啓佐我 太祖有功封鷄林君謚良敬良敬公
生虎賁衛上護軍吉祥上護軍生判漢城尹之
禮判尹生石城縣監守德縣監二子朔寧郡守
世豪敦寧府都正世賢皆以才學聞都正以長
子惟善貴為觀察使故以恩例縣監 贈禮曹
叅議都正 贈吏曹叅判郡守無子以都正之
次子明善為後明善為漢城府庶尹庶尹生擢
黃山道察訪娶昌原黃氏成均生貧瑞奎之女
隆慶五年辛未六月十八日公生萬曆三十一

言三男名長子四

年癸卯初仕為翊衛司洗馬一年陞侍直二年
陞副率又二年陞衛率衛率一年陞翊贊三年
移司憲府監察一年以軍資監判官為順安縣
令六年以治理聞 上特賜表裏陞通政仍任
一年天啓癸亥我 仁祖中興之年為陝川郡
守崇禎戊辰為清道郡守甲戌行長水縣監明
年五月十八日歿於官年六十五其九月歸葬
麻田郡治西十里獨將洞鄭氏族葬夫人幸州
奇氏 贈領議政應世之女判尹 贈左贊成
大恒之孫弘文館應教 贈吏曹判書遵之曾

孫也隆慶六年壬申三月廿七日夫人生崇禎
九年丙子六月十一日發明年九月祔葬同塋
公平生好良善與人無爭居家任職皆無怨於
人人亦無忤於已也奇夫人又有賢婦人之德
公既歿夫人哭之暮年而卒至於滅性云有二
男三女男弘基昌基進士長婿佐郎李時
茲次二婿沈之河慎覲弘基子華岳東岳東岳
進士婿鄭敷昌基子喬岳泰岳婿李后沈進士
李時苾子廷麟聖麟聖麟都事沈之河子樞楫
格婿二人李粹芳朴由潤慎覲子萬徽萬憲婿

持平慶軍郡守李悅李東者許豈金季珍

贈左贊成趙公墓銘

趙氏其先本漢陽人其昨土命氏蓋久矣高麗
世有諱之壽為僉議中書事生雙城揔管暉揔
管生良琪襲爵十三從金亥慶征日本又專征
哈丹獻俘于元元世祖賜玉帶錦袍以褒嘉之
於是聲名聞天下生龍城君璵龍城生左政丞
仁璧謚襄烈襄烈生右議政涓謚良敬良敬生
同知敦寧憐同知生司饗判官云明判官生縣
監英傑縣監生察訪壽崑善章隸名於世後以

大耋加折衝折衝生佐郎玆於公為皇考妣全
州李氏我大宋諸王子謹寧君縉之後而成
均生負克誠之女也公諱翼男字敬所自為兒
時敦厚則見嘗幼嬉戲拾庭杏落者一聞先府
君教戒終日不近口先府君心賢之比長學於
王方丈人洪春壽能勤苦日讀不倦同學皆莫
及也丈人常嘖嘖言此子立志如古人公蓋於
書尤深於太史公壬辰之亂先府君從宦在嶺
海千里道不通公奉母夫人避亂大嶺之西其
主人見公事母至誠心悅之資其有無無所愛

人皆曰孝子之感人也癸巳出嶺南毋夫人歿
於居昌方師旅飢饉而其治喪之節如衣衾棺
槨凡附於身者必誠必信而無憾焉人以為難
甲辰以先府君命應吏選初授繕工監參奉職
主鳴島刈萑事役用雇人其受直怠事者率勢
家私屬公一繩之役民大均其民至刻石不忘
云丙午先府君歿既卒哭返先夫人鞠合葬焉
時公將五十始衰猶食蔬食居廬三年不脫經
帶晨夕上塚哭不避風雨每朔望殷奠一日水
滛無以供具忽有鷺鳥擊筵墮於廬外奠不曰

異哉至誠所感盖有如此云既三年以孝聞儀
曹除司贍寺叅奉陞奉事癸丑四月二十二日
歿公生於嘉靖四十三年歿於萬曆四十一年
僅五十其六月丙申葬于抱川北十里先塋南
東向之原與柳夫人隔葬異塋任修撰叔英作
壙銘宋夫人葬在下公孝友出於至誠其居家
事親服勤就養思必盡愛之道而尤致謹於喪
祭猶恐其不得盡於禮也如宗族交友亦各得
其心官雖庫必思盡職平生不以喜怒形於色
有所善表賦在紙各累百篇嘗登名解額者且

數矣終不以文學見亦命也前夫人文化柳氏
贈左承旨愷之女而正郎思新之孫也生一男
一女男判中樞綱督縣監尹悅之夫人聰明有
至性善事舅姑子女方未長雖在流離中飲食
必有節衣服必以時令遊戲有常慶鄙倍之言
毋得出於口判中樞常言不肖之稱人由父母
教然也夫人少於公一年三十四歿後夫人鎮
川宋氏左承旨賀之孫而司贍寺奉事應一之
女也溫良極順篤於祀事至老不怠生一男三
女男緱少有學不幸早世督士人姜錫璜姜益

章縣監許豈判中樞十三 贈貞敬柳夫人歿
宋夫人撫之如已出長而以冠科顯歷事 三
朝貴逾九卿又以壽考進崇祿追爵三世折衝
府君為吏曹叅判佐郎府君為吏曹判書公為
議政府左贊成宋夫人以貞敬夫人壽八十七
歲夫人少於公十五年自判中樞登顯仕之年
至今四十二年榮養備矣判中樞室吏曹判書
金瓚女生一男三女男威鳳文科為便養方為
金化縣監胥縣監李惟楨直講李惇臨生負李
井徵悅之生二男二女男縣監坤叅奉壻胥牧

使李河岳儒生趙元鎮錫璜生二男一女男游
渭游叅奉胥直長尹梅益章生一女胥南煥生
生一女無子有所後子澄進士胥權德任生貢
緝室同知李顯女生威明世子翊衛司副率威
鳳生二子九輅九畹威明又二子九鼎九岭內
外至三世四世幾百人銘曰

惟孝友敦且淳積行累仁不發於其身宜其有
天道之報啓祐其後人

贈戶曹叅判洪公墓碣銘

公諱履一字亨五姓洪氏南陽大姓高麗太師

殷說之後也世有達官巨人至本朝 康靖時
有左議政應功業最大謚曰忠貞忠貞公生唐
陽尉常尚明淑公主以儀賓貴又以元功子襲
封唐陽君唐陽君生伯慶以武科貴歷諸道節
度使八為戶曹叅判乏祀以忠貞公弟太學生
貞恒曾孫允祐為後以禮賓寺別坐追 贈兵
曹叅議於公為曾祖祖諱德壽高城郡守 贈
吏曹叅判父諱思叢歷治州郡以治行顯以行
判決事卒 贈左贊成母光州金氏都護府使
秀淵之女也長子得一以科目進為閔東觀察

言子元之三

使公為仲子我 昭敬王十六年八月二十日
公生至三十九年公二十四以名譽拔擢連為
郡縣以治績聞當廢王時見世道大亂以旌善
郡守去歸寓居可興大江之上四年有 仁祖
反正之事其明年公四十一為戶曹正郎出為
州郡前後歷治二縣四郡一州一府為政廉平
所至皆有政清碑去後百姓追思不已大丘時
當丙子之亂大嶺以南兵革不及士大夫避亂
者多從之公周恤甚善客皆喜過望公私謂曰
當此時吾得專城之饒而豈可躬自厚而視人

之寒餓也況士大夫之失所流離者乎亦非為私也人皆賢之一日觀察公戲之曰居官政清固善矣其奈子孫何公笑曰行已無負此心足矣以此遺子孫後世不為不厚故公家庭教育訓不出直道孝友二事而已公平生以屈已媚事人為恥公州時與用事者不相悅即去歸後卒為所中以沔川郡守罷坐廢者二十餘年公處之夷然不以拓落介懷無事後溪山水石蕭散自娛以至老

顯宗七年正月十九日公八十

四以壽終葬安峽縣治西六里祭堂北阿公初

娶玉城李氏生一女其壻監司李天基再娶綾
城具氏生必亨泰亨又一女其壻申曼三娶牛
峯金氏生重亨始亨重亨為湖南右水軍節度
使又四女其壻佐郎李省李壽箕宣傳官尹熙
慶李東魯又庶出女四人其壻黃道碩進士金
重鍊僉知柳叵生負姜珣子孫甚多惟申曼無
子義絕銘曰

簡而廉直而無覲嗚呼壽考之正

贈禮曹判書姜公墓誌銘

公諱翼文字君遇號戇庵姓姜氏本晉陽人自

其四世祖承顓徙陝川遂為陝人大父仁壽父
世倬以子孫之貴追爵仁壽為司憲府執義世
倬為同副承旨公少以詞賦致名譽二十二己
丑進士三十九丙午增廣及第戊申以成均學
諭兼講院說書光海元年己酉以禮曹佐郎四
年之間三為正言四為獻納六為持平五為文
學癸丑以掌令移弼善改濟用監正又再為司
諫時有大獄李文翼公德馨諫永昌事論以按
律公不肯從始貳於時議甲寅光海殺永昌鄭
公蘊上䟽極言以大廷論死公即偽疾辭官而

長男大遂在諫院亦以爭論得罪公貶忠原縣
監卒為所中陷於縲絏者九年或私說曰縲絏
良苦方今廢母妃事急何不令子弟上疏言此
事因且釋矣公慨然以死拒之癸亥 仁祖既
反正公遂得釋辛未為典籍有論者言前事欲
沮之東都公上疏具陳終始其事乃釋明年由
奉禮復為濟用監正入謝即去歸田里閑暇自
娛以壽考終以齒典陞通政後推恩例追爵禮
曹判書公平生不喜華靡衣取便體食取適口
而已常戒子弟曰母以老父故受汙性慙慎不

事外飾與人無表襮見不善與之不少假以故
不善者多不說公生於隆慶三年正月十三日
歿於我仁祖二十七年五月七日為八十一
葬於宜寧之洛西貞夫人陝川李氏亦八十九
歿而祔葬生三男二女長男大遂守東都尹三
娶而生二男三女男徽衍徽萬壻三人縣監李
堂揆金庭翊李時格又有庶出子徽潤壻李命
吉次男大適生徽敏徽重徽望壻二人趙璣吳
善基又庶出子徽俊徽傑少男大延生徽鼎徽
晉壻三人李斗樞金鏐宋廷泰長女適別提李

汝漢有四女壻鄭有佑安時進李義謙河自渾
次女適叅奉鄭惟熟銘曰

慤而直質而淳惟壽考之祺又以子孫之振振
承政院右承旨姜公墓碣銘

公諱大遂字學顏姓姜氏其先本晉陽人高麗
太師民瞻之後也累世居陝川為陝人曾祖仁
壽 贈司憲府執義祖世倬 贈同副承旨父

翼文司諫院司諫 贈禮曹判書以公貴故得

推恩三世丹貞夫人陝川李氏萬曆十九年辛
卯十月三日公主聰明嗜學自少時得才名甚

盛聞者多慕與之交三十選國子試後年登第
初授侍講院兼說書尋陞司書遷司諫院正言
明年甲寅光海殺永昌鄭公蘊諫而當死公以
爭論并得罪時鄭仁弘方貴用公嘗指之曰執
拗私意喜人佞己以故深疾之至此因擠陷不
已初削官竟付處淮陽公刻苦勵行能得處困
之正人皆賢之癸亥春仁祖既反正釋為寧
邊府判官即改戶曹佐郎秋陞禮曹正郎明年
以正言移司憲府持平尋陞掌令兼編修官丙
寅復為掌令知製教丁卯有虜亂為號召使

鄭公經世後事出嶺南募諭尚慶子弟收召義
兵三月虜既和親乃罷兵四月陞司諫院司諫
累轉宗簿寺正戊辰出順天三年以病去當罷
上命遞職而已辛未入玉堂為副修撰兼經
筵檢討官後年春陞修撰尋陞副校理兼經
筵侍讀官夏改軍資監正兼侍講院文學秋出
為靈光癸酉復召為修撰甲戌在玉堂論追崇
之失禮凡五劄累千言乙亥秋由司諫移濟用
監正冬以繡衣廉問湖西去守令不用法尤甚
者丁丑春為副應教戊寅夏復以司諫出南原

明年陞通政為東萊辛巳為晉州三年以疾罷
甲申春為同副承旨兼經筵叅贊官至右承
旨夏改兵曹叅知尋陞叅議論海西軍案積弊
變通事上從之冬出尹東都明年冬以副護
軍上東宮喪制疏丁亥由判決事復出密陽明
年以父憂去孝宗元年庚寅應旨上萬言疏
冬復以判決事拜八政院後年三月為全州大
尹一年去此後連有召命而以母老皆不起
丙申春又應旨言時事有奢侈太盛私意橫流
之戒戊戌四月十九日卒年六十八葬宜寧洛

西上以禮賜祭而遠近皆曰賢大夫亡矣公
立朝近五十年恪心謹慎裨益既多而又賢於
治郡去後皆有遺愛晚年自號寒沙晚隱好讀
易日誦一卦以潛玩焉作石泉書齋以待學者
同郡作伊淵書院宜寧作德谷書院眷眷於儒
者緒業而考其家狀公重儒術尚溫雅恭儉謙
廉為平生受用之大法云公三娶而有二男三
女前夫入宗室寧堤君錫齡之女生一力曰徽
行後夫人叅奉李鼓之女生一男三女男曰徽
萬智三人縣令李堂揆士人金庭翊李時格末

娶鄭夫人縣監暄之女無子又有側室子曰徽
潤銘曰

惟恪惟謹惟大夫之飭也惟儉惟恭惟大夫之
式也

東巖公墓陰記

公諱詠道字聖興別號東巖姓李氏本真寶縣
人大父諱滉判中樞府事 贈領議政謚文純

父諱憲軍器寺僉正母奉化琴氏司導寺僉正
致瀋之孫訓導某之女嘉靖三十八年己未九
月十一日公生自為兒時敦厚特異文純公曰

異日綿吾世者此兒也十三琴夫人歿其哭泣
之哀居喪之節一如成人又十三年僉正公歿
有二兄皆不勝喪死公獨守喪居廬宋公言慎
嘗奉使嶺南入其鄉為之哭吊而去既復命
上曰南中有何事對曰無他事故儒臣某之子
某死而其二子皆哀毀死有少子某累然居廬
而哭亦不忍見也 上為之歎息仍命俟其服
闋官之不次既三年除軍資監叅奉累轉濟用
監奉事及壬辰之亂 上西狩急百官多徒步
從 上上問之非侍從令勿從也以故公南歸

為安東義兵從事明年九月為連原道察訪時
忠州缺牧使公兼任七月州民大悅上書借公
為牧使時當大亂列邑皆用武人以治兵公以
察訪蕪州判官攝牧使事方師旅飢饉既殫財
力以賑飢募人耕數千頃田秋大熟得穀萬斛
板蕩之後州有積儲始此丙申適去後累有除
命皆不就明年五月以戶曹多事領得人舉公
為佐郎後月經理渡兵龍濟問兵食備局以能
特遣公公条列便宜應對詳密經理大賢之事
間特陞正郎復命上面勞之仍賜醢寵待之

殊甚時大軍南下廷議以公長於籌畫先遣之以備餉公至安東先移列邑調度轉輸身後大軍於東都給餽餉不乏秋仍以版籍郎驗災於本道明年為玄風縣監一年以治理賜表裡又一年陞金堤郡守四年陞青松都護府使及光海四年為司僕寺僉正仍陞軍器寺副正尋出為榮川郡守乙卯自榮川歸見世道日亂無意仕宦累官皆不就自守十年仁祖反正之年為益山郡守己巳為繕工監僉正謝恩即去庚午春為內膳寺正其冬為原州牧使有有力者

年人葬地怒其不售卒為所中去丙子八月為
軍資監正以老不就明年二月廿六日歿年七
十九其十月葬于文純公墓左南向之原淑人
趙氏忠定公櫟之孫也有二男長岐次嶷岐啓
功郎嶷社稷署叅奉又有庶出子女四人男嶧
女三人其婿朴以煥金後善李旣岐生希哲克
哲女三人其婿琴三達琴聖徽任憲聖徽進士
嶷生命哲誠哲信哲允哲命哲慶基殿叅奉誠
哲山陰縣監女三人其婿柳敬之高爾齡黃石
來嶧有一女嫁生負鄭日知無子有繼後子後

拓朴以煥二子垣增金從善二子鑄錄鑄進士
李盱三子塽塽塽有六女長鄭佑周妻次李汝
舟妻餘四人幼初宗家絕嗣諸弟子皆曰伯仲
皆早世而無子今叔當為主公不忍伯氏之乏
祀也公攝祀事疑既長令為後於伯氏公平生
篤於宗族忠於交友好與人為善當官盡職不
問卑顯凡六為州郡令舉而事修一以便民利
物為心去後皆有遺愛焉公既歿十三年以宣
武原從追 贈承政院左承旨銘曰
確而巖敦厚而無侔于官于家小人所懷君子

所多

進士韓君墓表

公諱璿字休景姓韓氏韓氏系出上黨我開國
相文簡公尚敬之五世孫而文襄公繼美之曾
孫驪州牧使嶽之孫禮曹正郎亨信之子宗室
昌化君長孫之外孫也嘉靖十一年六月廿七
日公生早孤為後於伯父副司直亨俊隆慶元
年我恭憲廿二年三等進士性孝友事母無
違志姊妹兄弟之貧者其衣食服用多出於公
人以是賢之閑雅善談笑治園林每以令節會

宗族交友飲醉為樂一時貴遊名勝多從之年
五十二終萬曆十一年五月十九日葬于安山
烽峴北麓妻李氏我太宗別子孝寧大君補
之後而署令仁弘之女有婦德公之孝友行於
家亦多賢婦人之助一門歸心焉嘉靖五年十
二月十八日生萬曆二十一年七月四日歿年
六十八合葬安山舉三男二女長男彥恂秩從
二品次彥恒彥幅壻許哲李燭彥恂生潛洧洧
潛副司果洧以武舉官至三品彥恒無子彥幅
生一女壻沈景鼇潛生德亮

司憲府監察鄭公墓表

公諱若字順勝姓鄭氏其先本晉陽人高麗名臣鄭吉寧之六世孫而我明宗諫官鄭思顯之子也十六先府君歿事母至孝好儒術我宣祖二十三年以行誼選為齋郎明年李氏歿鄭氏先塋皆在上黨因守塚不去時有倭寇郡邑皆漬賊連陷三京國大亂州父老謀舉義兵鄉有前郡守趙綱長者衆推以為將綱辭曰吾已八十老不能同州鄭若賢可任將旦名族欲拜將無出此人其人居憂以義強起之無辭以

拒之也既二返乃起於是傍縣諸義兵多起而軍無見糧公首募義粟以給軍食軍勢益張自金公汝圻敗沒於忠州其老母奔竄客死連山公為之棺殮以歸聞者義之癸巳賊既約成屯海上冬車駕還京有事公召至京師為司醞署奉事明年夏特拜司憲府監察公既病革未謝為洪川縣監已歿矣年四十八後論功賞追爵戶曹叅議夫人仁川蔡氏世子左弼善倫之五世孫也夫人事姑有至誠稱善行先公七年而歿及公歿合葬於廣州治東石林江上之原有

二男三女以謙以濟壻三人察訪黃澹士人韓
詭具淳以謙生民瞻成均生負無子女壻五人
尹榮朴弘遠朴大震成夏績李匡濟皆七人以
濟生民覺民逸民獻民獻成均館學諭壻五人
教官金重榮丁時祗洪處敏尹徵禹南宮塹韓
誕生有行有衡有衍有衍壻二人李幼澄郡守
柳時成黃澹具淳無子

文城君墓碑銘

公名諱健字仲以 成宗諸王子景明君忱之
孫安南君壽鍊之子母青松縣夫人沈氏弘文

館典翰義欽之孫公子十六為後於鳳城君屹
鳳城君 中宗諸王子而死於乙巳獄者也

宣祖世釋其寃復其封爵立後令不絕其祭祀
公子初以文城副正陞正二品封為君公子好
施與篤於行詎號為佳公子鳳城君一女公子
懽事之臨財必薄取而厚奉給宗族愈賢之公
子善楷書射藝絕人 上悅之每賞賜之甚厚
壬辰之亂 上西幸公子奉縣夫人奔竄貂北
淮陽途中遇帥府從事巡過關東郡縣者具言
賊塞路無因緣以達行在狀從事問之指間路

資送行在 上即召見賜食慰喻拜尚食提調
累轉都檢管典禁兵丁酉從 懿仁王后於遂
安己亥賞扈從群臣公子進階崇憲 上會文
武宗親臨試射有一宗室善射者與公子爭
的者有勝負勝者當受爵其宗室私謂公子曰
公子絕藝何可當也但願受賞爵以悅老母心
公子賜也公子許諾當射故失的以讓之觀者
大悅莫不曰公子之高義也當光海時有宗室
數輩欲私結寵幸上疏助為廢母后之說欲假
名於公子勸起之動以福禍公子嘆曰吾老且

死義不可負 先王於今日因不出慷慨憂傷
飲醉自遣及 仁祖改王公子已久病扶疾入
賀疾漸劇仍卒癸亥三月廿六日享年六十四
訃聞 上震悼不視朝二日 賜賻如儀以禮
葬于楊州治東獨將里南向為封公子以宗室
尊屬未嘗以貴盛加人恪慎不懈待僚屬有禮
禦吏胥有恩居家無事治園林植花卉樂與賓
客飲惟一時名譽之士多從之遊光海時見世
道日亂遂謝客以壽終初娶慶州金氏 宣祖
相忠翼公命元之女封鵷林縣夫人早卒後夫

人慶氏高麗名臣慶復興之後而同中樞時宏
之女又早卒無子金夫人生一男一女男始林
君世俊督敦寧府都正具仁基側室男漢陽守
世柱始林君生一男二女男靈昌正格二督觀
察使洪命一士人金益重漢陽守生三男六女
男完昌令楹甄昌令樛安昌令憶督崔洵金益
聲李純樛李敏培女未嫁者二人其銘曰
篤而和且黻宜其見義守死不易其志

贈議政府左贊成權公墓碣銘

公諱暉字晦可姓權氏系出安東高麗太師幸

之後而我國初名臣文忠公近之七世孫也曾

祖 贈領議政勳祖 贈左贊成軹父 贈判

書棕母鎮川林氏嘉靖三十三年甲寅公生性

介潔自在髫髻已不與凡兒比見者竒之及就

外傳自知力學長而益勵簡正自飭嗜古文非

先秦兩漢之書不讀也於文一趣古人蹊逕不

喜徇俗為決科之利後祖權公輟為宰相高其

志行欲官之見公無屈意愈益賢之先府君嘗

歷典郡邑公侍側不逾尺寸無一子弟之過先

府君稱之曰吾見子弟侵官政累父兄者多矣

吾兒有是。否壬辰兵革大起。公曰。挾賞草間。免於暴客者鮮矣。不以貨物自隨。奔竄道路。奉養老母。動以至誠。行路賢之。春先府君為錦山。其地陷為賊所。先府君臨亂不去。死於官守。而方伯得罪事。不上聞。後公從草土上書其事。得顯上嘉之。追贈某官。命錄用其後。初先府君死。郡人為之收殮焉。公入賊中求殮。以返父老。歎曰。賢哉孝子之至誠也。公素多病。居喪毀感三年。遘癘。疫客死。保寧甲午七月廿一日。年四十一。是年有齋郎之命。而公已歿矣。公疾病以初

喪之禮屬其妻李氏曰吾客死無親戚顧我勉其禮令毋憾於正終也既歿李氏自襲至殯一如所指因旅葬其鄉哭泣哀甚每祭祀必陳新衣服祭畢藏之後二十四年改葬易棺而殮殮用藏衣服後家貴盛夫人食三牲之養年至耆耄祭祀必親之有新物非薦不嘗哭之如初林夫人年高竟致養五十年至誠不怠教子孫必以奉先悌長慎言為戒為家惠而能嚴使長幼上下斬斬有分無一苟且隳家法也以恩例追爵公左贊成夫人為貞敬夫人夫人籍慶州都

事希參之女進士夢奎之孫崇禎十三年七月
十七日夫人歿為八十八歲與公合葬于抱川
注葉山西麓長男縉為判書次綵為郡守皆無
子次統為副正次緒為主簿又二男早歿皆一
入金光燧為某官統生二男二女男侑脩侑縣
監脩學諭為伯父後胥二人持平沈世鐸執義
沈儒行緒生一男三女男偉進士胥三人韓奎
一宋基昌申漢奎一為都事內外曾玄孫四十
餘銘曰

不苟不汙志高而行潔歿身不怠而其子孫之

遺濟濟而揭揭

贈吏曹參判姜公墓碣銘

公諱秀崑字汝鎮姓姜氏其先晉陽人我中
廟功臣永善君漬四世孫也永善君生僉正世

琛世琛生

贈執義礪礪生

贈參判應運應

運生公母宗室女文川正壽早之女也公生七

年父歿養於外姑姑懿仁王后之母也有祖

母年高奉養有至性一日姑饋肉公受而不食

姑問故公曰歸遺祖母姑心賢之日給甘旨

宣祖十五年初仕為昭格署參奉累轉漢城參

軍士辰有倭寇 上幸平壤事急后妃家將不
相及公以儀親 上雅信之令寄屬之遂從
上西其明年由工曹佐郎為高敞縣監方師旅
之際國大飢人相殺食公能畫辦以賑飢於是
兩湖流民千數而北方之親戚故人飢寒客者
日且數百公躬自薄以給人所活千百人由是
名益顯四年以事責罷縣父老遮道乞留於方
伯民間爭出軍餉以贖其罰既不得則皆涕泣
如失親戚後歷治數郡治常第一澹泊居無室
廬出無款段家屬苦貧公不以為意居家篤於

祭祀仁於宗族平生言不及臧否得失性敦厚
愛人然見一不善相對不與言人羞之寧撻之
於市猶恐其得過於公以敦寧僉正當光海時
十年不遷六十六歿葬廣州西龜川里遠近來
吊者至五六百人妻李氏亦國族 贈承旨鏗
之女生二男二女長子某以科第顯爵至同中
樞次子善慶縣監婿二人府使崔珪士人趙成
後又庶出女一人為楊湜妻某生司果元祿女
一人適郡守權聖源又有後出子元禎元祉善
慶生縣監元禧外孫八人叅奉崔碩量奉事崔

穀量趙澆趙澆趙沆趙浣楊萬紀楊萬齡又崔
氏婿四人察訪李翰衢進士金栻安鉉柳重殷
皆有子孫蕃衍至百餘人信乎有德者之報也
公初以從 上勞錄原從 贈承旨後以長子
貴故加 贈吏曹叅判李氏為貞夫人銘曰
德鉅而施博其賁於身者夥耶位卑而食薄以
待其子孫者夸耶

贈兵曹叅判許公墓表

公諱鉤字直中姓許氏許氏出自駕洛新羅末
有諱宣文事麗祖有功食采孔巖子孫遂為孔

巖人世有名人達者高宗世有諱珙位至僉議
中贊謚曰文敬至今東方諸許多祖文敬公文
敬公八世有諱琛位左相謚文貞於公為曾祖
祖諱礪左贊成父諱埴典獄署主簿追贈吏
曹叅判母高靈朴氏大司諫仲幹之女明宗
幼時常出閭閻遇公為同年生戲嬉日相得或
云公因少名上賜名為鈞上既即位初授
禁火司別提轉內膳寺直長陞典牲署主簿尋
改司憲府監察連補外歷并邑青山和順皆有
治績又為果川沃川不赴後拜尚州判官當

宣祖二十三年時有倭人獻孔雀公歎曰此大
亂之兆可以去矣即棄官歸其明年果有倭寇
國大亂公浮海至湖西故相澈體察兩湖起公
為禮山縣監辭不起復拜唐津縣監其年歿於
官年六十一 宣祖二十六年六月五日也時
當師旅飢饉道不通旅葬邑居之傍後二十四
年返葬畿甸許氏先葬在長湍者七世自公始
葬富平之黔丹山下公器識卓異少讀書自負
其才三十四舉國子試終不得博士科選命也
平生簡潔凡五為郡邑家苦貧公晏如也公初

言言身是卷三
三
娶宗室平原監女無子後娶僉知樞府全義李
文淑女生曙曙以武力登甲科爵至同中樞嘗
以長端大都護為京畿右防禦使例贈公兵
曹參判孫男女五人男緯緯綽綽綱女嫁吳達榮
又有庶孽孫男女三人男曰緝臂二人尚義詹
具崗內外曾玄孫二十餘人 仁祖二年五月
五日李夫人歿迺術葬同原前夫人墓在古廣
州治北舊川里平原世葬

議政府舍人姜公墓表

姜舍人諱克誠字伯實晉山君希孟之玄孫晉

山君生掌隸院司評鶴孫司評生順天都護府
使台壽為伯父右議政龜孫之後於公為皇祖
考皇考諱復以門子初授忠佐衛司勇阜世公
生於嘉靖五年丙戌以竹醉日生故號醉竹公
既少孤外祖金文敬公教育之天資穎悟有異
材日誦累千言學自成致名譽嘉靖二十五年
我恭憲元年選國子試三十二年癸丑擢大科
又三年選重試文益名初選翰林入玉堂由正
字至應教兩司至執義司諫都堂為檢詳舍人
嘗賜暇書堂上遣中貴人宣醢既酣中貴人

別集卷之三

三十三

廼出御題五帝詩宣言即日製進既日暮矣

公攝醉即應製既進上稱歎之賜良馬一

匹一時傳誦之將大顯矣有不悅者媒孽之見

斥幾十年放跡江湖吟哦自娛更自號保晚堂

嘗有詩曰朝衣典盡酒家眠賜馬將謀數頃田

珍重國恩猶未報夢和殘月獨朝天我昭敬

即位感而思之特召為濟用監正尋出為長湍

都護府使歿年五十淑人昌寧成氏故安東

大都護府使謹之女生三男三女先慶宗慶皆

以文學進先慶為閔東道都事宗慶為成均館

學諭少子世慶初以門地得仕為掌讓院司議
督三人李廷弼李用擇權霽廷弼為永春縣監

成均館學諭姜公墓表

公諱宗慶字

別號梅墅醉竹姜舍人之中

子生而聰明天資絕倫於書一過眼終身不忘
善談易一時諸儒多許之者隆慶四年我昭
敬三年庚午選國子試三年壬申擢大科薦翰
林有當路者去之仕止國子學諭萬曆四年舍
人公歿又四年母成淑人歿未卒喪羸毀卒年
三十八客嘗問疾與語良久自切脉曰吾不見

明日此時客恠之歿而果驗云公能通岐黃之術耶抑得數而推之耶何其異也以公才識卓越名譽早著將期其大用矣不幸早世嗟乎命也孺人申氏先亡憐其穉子欲依嘗與成牛溪先生故義州都護金公某最相善臨絕托寄其二子以故晉昇養於成氏晉昭養於金氏兩家之世相傳愛之如親骨肉為義談於後世云孺人僉正申汝樑之女長子晉暉亦以才學著聞為司圃署別提以晉昇生負次晉昭歛谷縣監督三人鄭得悅李致愛李惟仁得悅為泗川兵

馬都尉萬曆二十五年死於閑山之敗晉昭有
長子裕後以乙科進方出為清州

贈花興君張公墓碣銘

張氏出自新羅羅亡有太師吉與羅之亡大夫
謀事高麗滅甄萱今嶺南安東府有大師廟張
氏子孫不絕君子以為樹德之報後世有諱思
吉事我 太祖 太宗有功貴顯封花山府院
君卒謚僖襄七世有諱榮以門蔭為保安道察
訪於公為皇考妣宜寧南氏公諱甲奎字卓爾
少有至性善屬文二十五得選監試二場擢第

二名文譽益著其後累屈於大科遂不復求舉
卜居臨津之上自號松林散人樂閑暇吟詩自
適以至壽考梧里李相國與為布衣交深相善
宣祖三十七年定中興元功會盟新舊功臣公
以功臣之世資滿例陞折衝將軍為副護軍後
三年冬歿壽七十九公初娶漢陽趙氏義絕後
娶青松沈氏生仲仁時公六十七歲公歿後仲
仁始仕仁祖世尋得科第推遷今為海州牧
使嘗以振武原從推恩贈公戶曹叅判襲封
花興君母沈氏為貞夫人公初葬楊州述堂里

上之二年十二月改葬長湍之古東坡 仁祖

十四年有狄兵沈夫人避亂湖西歿因旅葬於
咸悅至此乃合葬焉夫人國初名臣青松伯沈
德符之後也夫人既嫠孀治家教子如嚴父人
稱張氏婦人之賢七十八歿仲仁無嫡子有庶
孽子斗八公又有庶出子曰仲孝仲孝生戴銘
曰

松林青江水漪樂且壽恬而熙

記言別集卷之二十四終

